

Vikwazo



SABATO MCHANA

Somo la Juma Hili: Marko 4:35–41; Marko 5:21–34; Rum. 5:3–5; Ayu. 19:23–27; Ayu. 23:8–12; Luka 24:13–27; Rum. 8:18, 28.

Fungu la Kukariri: “Wala si hivyo tu, ila na mfurahi katika dhiki pia; mkijua ya kuwa dhiki, kazi yake ni kuleta saburi; na kazi ya saburi ni uthabiti wa moyo; na kazi ya uthabiti wa moyo ni tumaini; na tumaini halitahayarishi; kwa maana pendo la Mungu limekwisha kumiminwa katika mioyo yetu na Roho Mtakatifu tuliypewa sisi” (Warumi 5:3–5).

Jioni moja, jua lilipokuwa likizama kwenye upeo wa macho, msichana alikuwa akitembea kuelekea nyumbani wakati dhoruba nzito ilipoanza kuvuma. Aliongeza mwendo, akijua bado kuna umbali wa kutembea. Tone moja la mvua lilidondoka shavuni mwake, kisha lingine, na ghafla, alikuwa ameloa chepechepe. Akaanza kukimbia kuelekea mlango wa mbele wa nyumba yao, ambapo baba yake alimkimbilia kumlaki. Alikuwa akimtazama kutoka dirishani. Alipomfunika kwa blanketi mabegani mwake, akamwuliza, “Nilikuona sasa hivi tu, kwenye mvua. Kwa nini, kila radi ilipopiga, uliacha kukimbia na kutazama juu huku ukitabasamu?”

“Ah, nilisimama kuangalia juu,” akasema, “kwa sababu Mungu alikuwa ananipiga picha!”

Je, mwitikio wetu ni upi wakati dhoruba za maisha zinapokuja au tunapopitia changamoto katika uhusiano wetu na Mungu? Je, tunainamisha vichwa vyetu huku mvua ikitupiga migongoni, au tunatazama juu, tukijua na kuamini kwamba Mungu yupo tunapomgeukia kwa imani?

Juma hili, tutaangazia baadhi ya miitikio tunayokuwa nayo mara kwa mara tunapokumbana na changamoto za maisha. Tutaangalia jinsi tunavyoweza kutumia vikwazo vya maisha kuimarisha, badala ya kudhoofisha, uhusiano wetu wa muhimu zaidi.

**Jifunze somo la juma hili ukijiandaa kwa Sabato, Juni 13.*

Dhoruba za Maisha

Yesu alikuwa ameitumia siku akihubiri kwa makundi makubwa ya watu katika pwani za Galilaya. Maneno Yake yangekumbukwa kwa muda mrefu katika akili za watu na hata milele.

Jioni ilipowadia, Yesu akazungumza na wanafunzi Wake, akiwakaribisha katika safari pamoja Naye: “Na tuvuke mpaka ng’ambo” (Marko 4:35). Yesu alijua dhoruba ingekuja, lakini bado akapendekeza waende. Alikuwa na somo muhimu la maisha alilotaka kuwafundisha wafuasi Wake wa karibu.

Bila shaka unajua kilichotokea.

Soma kuhusu dhoruba hii tena katika Marko 4:35-41. Ni mafundisho gani juu ya imani unayoweza kupata kutoka katika aya hizi?

Zingatia hoja hizi:

1. Yesu analala usingizi juu ya kile kinachoonekana kuwa mto pekee katika mashua. Mashua za uvuvi kwa kawaida zilikuwa na mto mmoja, ambao dereva wa mashua, katika shetri, alikalilia. Mtu aliyekuwa katika shetri ndiye aliyekuwa akiielekeza mashua kufika ilikokusudiwa. Hivyo basi, Yesu yuko katika nafasi ya “dereva” wa mashua, lakini analala akiwa kwenye usukani.
2. Si wanafunzi wote walikuwa wapya katika masuala ya kusafiri baharini. Petro, Yakobo, na Yohana walikuwa wavuvi wenye uzoefu. Waliijua bahari ya Galilaya, na wangukuwa wanajua jinsi ya kuongoza mashua wakati wa dhoruba.
3. Hii ndiyo simulizi pekee katika Injili inayoandikwa juu ya kulala usingizi kwa Yesu. Wakati wa moja ya dhoruba mbaya zaidi katika maisha yao, wanafunzi walipokuwa na hofu na wakidhani wangukufa, Yesu alikuwa amelala katika shetri.
4. Mwitikio wa wanafunzi wakati wa dhiki yao ulikuwa “si kitu kwako kuwa tunaangamia?” Walihoji tabia ya Yesu na upendo Wake kwao. Mara nyingi, huu ndiyo mwitikio wetu tunapokumbana na nyakati ngumu.

Ni katikati ya hali ya kukata tamaa ndipo tunaweza kujaribu kujiokoa wenyewe (kama wanafunzi), au wakati mwingine ni tunapohisi maumivu au kupoteza ndipo tunapoanza kuhoji au kutilia shaka upendo na utunzaji wa Mungu kwetu. Tunadhani kwamba Yeye anapaswa kutenda kwa namna fulani kulingana na tunavyofikiri na kuona kutoka katika mtazamo wetu wa kibinadamu. Lakini, kama ilivyokuwa kwa wanafunzi, ni katika dhoruba za maisha ndipo Mungu anaweza kufanya miujiza mikubwa zaidi. Mungu ni mwaminifu kila wakati, hata pale ambapo kutokuwapo kwake kwa dhahiri hakueleweki kwetu. Yuko pamoja nasi katika dhoruba zetu na anaweza kuituliza dhoruba pale ambapo sisi hatuwezi.

Je, mwitikio wako wa kawaida ni upi unapokumbana na dhoruba katika maisha yako? Je, nyakati kama hizo huathiri vipi uhusiano wako na Mungu? Ni lini umeiishi 2 Wakorintho 5:7?

Umeponywa

Fikiria msongamano wa watu katika pwani ya Galilaya. Walikuwa wakimsubiri Yesu arudi tangu asubuhi na mapema, na anaposhuka kutoka kwenye mashua, wanamsogelea kwa karibu, wakimfuata hadi kijiji cha Kapernaumu. Ghafla, Yairo, mkuu wa sinagogi, anatokea na kumsihi Yesu aende kumponya binti yake.

Mmoja wa watu waliokuwa katika umati ni mwanamke aliyekuwa mgonjwa kwa miaka mingi. Alitumia fedha zake zote kwa madaktari, lakini “kusimfae hata kidogo, bali hali yake ilizidi kuwa mbaya” (Marko 5:26). Alikuwa amesikia habari za Mtu huyu mkuu kutoka Galilaya, na kwa tumaini moyoni mwake, anakusanya nguvu kidogo alizokuwa nazo kuondoka nyumbani kwake asubuhi hiyo ili kuungana na umati. Msongamano wa watu ulisonga kiasi cha kukosa hewa alipojikokota kumkaribia Yesu. Kisha, katikati ya kusukumana na kusongamana, anamwona. Anajitia moyo: “Nikiyagusa mavazi yake tu, nitapona” (Marko 5:28).

Soma Marko 5:21-34. Nini kilitokea, na tunaweza kujifunza nini?

Tukio hili linaonesha kujali kwa Yesu na huruma kwa wagonjwa na waliotengwa, na wale ambao kwa kawaida wanaonekana kutozingatiwa. Wengi siku hiyo walikuwa wakimsogelea Yesu kwa karibu walipokuwa wakisukumana pamoja na umati, lakini ni mmoja tu aliyemfikia kwa makusudi ili apokee baraka aliyokuwa akihitaji kwa hamu. Hata hivyo, si mguso wake uliomponya; bali ni imani yake iliyomponya (Marko 5:34). “Mwokozi aliweza kutofautisha mguso wa imani na mguso wa kawaida wa msongamano wa watu.” —Ellen G. White, *The Desire of Ages*, uk. 344. Vazi la Yesu halikuwa na nguvu maalum; bali ni imani ya mwanamke huyo na uamuzi wake wa kumsogelea na kumgusa ndiyo iliyomponya.

Mwanamke huyo dhaifu, katika mateso na dhiki yake, angeweza kubaki kitandani nyumbani asubuhi hiyo, lakini badala yake, aliamua kwa makusudi kumtafuta Yesu kwa tumaini la kuponywa. Kumwona akiwa mbali hakukutosha; alimsogelea kwa karibu.

Yesu anatuita kufanya vivyo hivyo leo. Anasema, “‘Njoni kwangu, ninyi nyote msumbukao na wenye kulemewa na mizigo, nami nitawapumzisha. Jitieni nira yangu, mjifunze kwangu; kwa kuwa mimi ni mpole na mnyenyekevu wa moyo; nanyi mtapata raha nafsini mwenu’” (Mathayo 11:28, 29).

Je, mwanamke huyu katika uhitaji huo mkubwa alioneshaje mawazo katika Warumi 5:3-5? Hili linaweza kuonekana vipi katika maisha yako?

Ayubu

Tunapofikiria kuhusu changamoto katika Biblia, Ayubu huenda ndiye mtu wa kwanza anayekuja akilini. Hakupoteza tu mali zake zote (*Ayubu 1:14–17*), bali pia alifiwa na watoto wake (*Ayubu 1:18, 19*) na kupoteza afya yake (*Ayubu 2:7*). Kisha mke wake alijaribu kumshawishi amkufuru Mungu na afe (*Ayubu 2:9*).

Baada ya muda, rafiki watatu walikuja kuketi na Ayubu. Walishtushwa sana na mwonekano wake kiasi kwamba walikaa naye pasipokuzungumza chochote kwa siku saba (*Ayubu 2:13*). Hatimaye walipoanza kuzungumza, walijaribu kutoa sababu za kibinadamu kuhusu sababu ya taabu hiyo kubwa kumkumba Ayubu, lakini kwa kufanya hivyo, waliongeza mateso yake bila kukusudia. Rafiki hao watatu walimlaumu, wakisema lazima kuna dhambi iliyofichika katika maisha yake anayopaswa kutubu (*Ayubu 8, 11, 15*), hata wakasema, “‘Hakika ndivyo yalivyo’ makazi ya wapotovu, Na hapa ni mahali pake asiyemjua Mungu’” (*Ayubu 18:21*).

Je Ayubu aliitikiaje? Soma Ayubu 19:23–27 na Ayubu 23:8–12.

Haidhuru matukio ya kusikitisha yaliyomzunguka, na ukweli kwamba hakuyaelewa, Ayubu alibaki kuwa mwaminifu. Alishikilia imani yake. Hakumlaumu Mungu wala kumkufuru. Badala yake, alipojaribiwa kumlaumu Mungu, alitamka: “‘Mimi nilitoka tumboni mwa mama yangu nili uchi, nami nitarudi tena huko uchi vilevile; Bwana alitoa, na Bwana ametwaa; jina la Bwana na libarikiwe’” (*Ayubu 1:21*).

Sisi pia tunaishi katikati ya vita hii hii. Shetani hutuletea maumivu, mateso, kufiwa, na shida kama sehemu ya mpango wake wa kupotosha taswira yetu ya Mungu mwenye upendo. Katika nyakati kama hizo, tunaweza kuitikia kwa njia moja kati ya mbili: kumlaumu na kumkataa Mungu, au kushikamana naye kwa nguvu zetu zote. Ingawa vita ni kali, tunapaswa kukumbuka kwamba, kwa mtazamo wa milele, matatizo yetu ya muda ni majaribu ya muda tu (*2 Wakorintho 4:16–18*). Kuna mengi zaidi katika taswira kuliko tunavyoona hapa na sasa, na mojawapo ya changamoto kubwa kwa muumini ni kumtumaini Mungu hata katika nyakati za giza kabisa. Mungu ametufunulia kwa njia nyingi uhalisia wa upendo Wake. Tunapaswa kung’ang’ania ukweli huu muhimu—wa upendo wa Mungu—hata pale ambapo hatuuoni kwa wakati huo.

Kama uko katikati ya wakati mgumu sasa hivi, mkimbilie Mungu. Chukua Biblia yako na daftari, kisha nenda nje kuwa na Mungu katika mazingira ya asili. Nakili Warumi 5:3–5, na tafakari ujumbe mbalimbali katika kifungu hiki, ukiamini kwamba upendo na utunzaji wa Mungu kwako ndiyo jambo la hakika na thabiti zaidi katika maisha yako.

Njia kwenda Emau

Yalikuwa majuma machache mazito kwa wale wanafunzi wawili walipokuwa wakikumbuka katika akili zao baadhi ya matukio na mazungumzo waliyopitia. Kuingia kwa ushindi Yerusalemu na kutakasa hekalu. Pasaka katika chumba cha juu. Maombi ya Yesu kule Gethsemane. Usaliti mbaya wa Yuda. Shitaka, dhihaka, na kupigwa. Mwili wa Yesu uliokuwa umejeruhiwa ukining'inia msalabani na maneno Yake ya mwisho kabla hajakata roho huku anga la alasiri likifunikwa kwa giza. Kupasuka kwa pazia la hekalu kwa sauti kubwa. Makaburi ya wenye haki yakifunguka. Kuchukua kwa upole mwili wa Yesu kutoka msalabani na kuuweka kaburini kabla ya Sabato. Na kisha machafuko, kukatishwa tamaa, na maswali katika akili za wanafunzi. Walikosea wapi?

Wafuasi wa Yesu walikuwa wamevunjika moyo, wamekata tamaa, na kuchanganyikiwa. Hili lilikuwa pigo kubwa zaidi katika maisha yao. Kile ambacho hawakuona ni kwamba hili lilikuwa tu tukio moja katika kisa adhimu zaidi kuwahi kutokea. Wakati wawili wao walipokuwa wakitembea katika njia ya kuelekea Emau, Yesu alitokea na kutembea pamoja nao.

Soma mazungumzo katika Luka 24:13-27 na fikiri kuhusu mitazamo miwili tofauti: wafuasi wawili, na Yesu.

Mara macho yao yalipofunguliwa, wale wafuasi wawili walikimbia kwenda Yerusalemu kushiriki mambo yaliyowatokea njiani (*Luka 24:33-35*). Yesu alipokuja na kusimama katikati yao, waliogopa sana. Tazama maswali Yake kwao: “‘Mbona mnafadhaika? Na kwa nini mnaona shaka mioyoni mwenu?’” (*Luka 24:38*).

Huu ni ujumbe wa Yesu kwetu leo pia. Mara nyingi tunasahau kwamba Yeye anatembea pamoja nasi katika mabonde yetu. Mara nyingi hatumtambui. Mara nyingi tunasahau kwamba kuna mengi zaidi katika kisa. Mara nyingi tunasumbuka na kuruhusu mashaka kujaa mioyoni mwetu, tukisahau kwamba Yesu anashikilia maisha yetu pasi na hofu mikononi Mwake. Na mara nyingi tunadhani tunajua zaidi kuliko Yesu kuhusu kile kinachoendelea katika maisha yetu (*Luka 24:18*).

Biblia inatoa ushauri mzuri sana kuhusu jinsi sisi kama Wakristo tunavyoweza kuitikia katika changamoto na vikwazo. Tenga muda kusoma vifungu hivi vifupi: Warumi 8:28; Wafilipi 4:4-13; Yakobo 1:2-4, 12; na 2 Wakorintho 12:9, 10. Kama sehemu ya masomo yako, andika ujumbe muhimu wa aina tatu ambazo unaweza kushiriki na mtu anayekumbana na vikwazo kwa sasa. Weka akilini 2 Wakorintho 1:4.

Mtazame Yesu

Je, umewahi kutamani kumwona Yesu unapohisi kukatishwa tamaa? Jitazame katika ndoto hii.

"Nilionekana kuketi katika hali ya kukata tamaa kabisa, mikono yangu ikiwa usoni mwangu, nikitafakari hivi: Kama Yesu angekuwa duniani, ningemwendea, nianguke miguuni Mwake, na nimweleze mateso yangu yote. Asingenikataa, ningepata neema machoni Pake, nami ningempenda na kumtumikia daima. Wakati huo huo mlango ukafunguka, na mtu mwenye umbo na uso wa kupendeza akaingia. Alinitazama kwa huruma na kusema: 'Je, unatamani kumwona Yesu? Yuko hapa na unaweza kumwona ikiwa unatamani kufanya hivyo. Chukua kila kitu ulicho nacho na unifuata.'"

"Nilisikia jambo hili kwa furaha isiyoelezeka, na kwa furaha nikakusanya kila kilicho changu, kila kitu kidogo kilichokuwa cha thamani, na kumfuata kiongozi wangu. Aliniongoza hadi kwenye ngazi iliyoinuka na iliyokuwa dhaifu kwa kuonekana. Nilipoanza kupanda ngazi hizo, alinitahadharisha kukaza macho yangu juu daima, nisije nikapata kizunguzungu na kuanguka. Wengi waliokuwa wakipanda ngazi hiyo walianguka kabla ya kufika kileleni.

Hatimaye tukafika kwenye ngazi ya mwisho na kusimama mbele ya mlango. Hapa kiongozi wangu alinielegeza niache kila kitu nilichokuwa nimebeba. Kwa furaha nikaviweka chini; kisha akaufungua mlango na kuniambia niingie. Kufumba na kufumbua nikajikuta nimesimama mbele ya Yesu. Hakukuwa na shaka juu ya uso huo mzuri. Mwangaza wa rehema na ukuu uliokuwa ukimng'aria usingeweza kuwa wa mtu mwingine yeyote. Macho Yake yaliponitazama, nilijua mara moja kwamba alikuwa anafahamu kila hali ya maisha yangu na kila wazo na hisia ya ndani ya moyo wangu.

"Nilijaribu kujificha dhidi ya macho Yake, nikihisi kushindwa kustahimili macho Yake yachunguzayo, lakini alinikaribia kwa tabasamu, na akaweka mkono Wake juu ya kichwa changu, akasema: 'Usiogope.' Sauti Yake tamu ilisisimua moyo wangu kwa furaha ambayo sikuwahi kuipata kabla. Nilijawa na furaha kiasi kwamba sikuweza kusema neno lolote, bali kwa kushindwa kustahimili furaha isiyoelezeka, nilianguka kifudufudi miguuni Mwake. Nilipokuwa nimelala pale bila kujiweza, mandhari ya uzuri na utukufu ilipita mbele yangu, na nikahisi kana kwamba nimefikia usalama na amani ya mbinguni. Hatimaye nguvu zangu zikarudi, nikainuka. Macho ya upendo ya Yesu bado yalikuwa juu yangu, na tabasamu Lake lilijaza roho yangu kwa furaha. Uwepo Wake ulijaza moyo wangu kwa heshima kuu na upendo usioelezeka. . . .

"Ndoto hii ilinipa tumaini . . . [na] imani. . . Na uzuri na urahisi wa kumtumaini Mungu ulianza kuchomoza katika roho yangu iliyokuwa gizani."—Ellen G. White, *Early Writings*, uk. 79–81.

Katikati ya changamoto za maisha, tunapaswa kukaza macho yetu kwa Yesu na kile Anachofunua kuhusu upendo wa Mungu kwetu.

Ni tumaini gani unaweza kuchukua kwa ajili yako mwenyewe, sasa hivi, kutoka katika kile kilichoandikwa katika Warumi 8:18, 28?

Jifunze Zaidi: Ni wakati tunapokumbana na changamoto za maisha ndipo tunapohitaji kushikamana na Mungu kwa nguvu zaidi. Mada tulizochunguza katika robo hii zote zinachangia kudumisha au kufufua kutembea kuliko imara pamoja na Mungu. Unapokumbana na vikwazo kama vile changamoto za kiafya, matatizo ya kifedha, kuvunjika kwa ndoa, kifo cha mtu wa karibu, au mzigo mwingine unaokuondolea furaha, tafakari maswali yafuatayo na uzingatie masomo uliyojifunza hadi sasa.

Maswali ya Kujadili:

- ① Je, ni kwa namna gani changamoto yoyote unayokabiliana nayo, au uliyowahi kukumbana nayo, imeathiri mtazamo wako kuhusu Mungu? Unawezaje kuona kwa uwazi zaidi tabia ya kweli ya Mungu?
- ② Ni lini uliomba kwa mara ya mwisho ili sauti ya Mungu katika maisha yako iwe na nguvu kuliko ya adui? Mwivi (Shetani) haji ila aibe na kuchinja na kuharibu, lakini Mungu hutoa uzima tele (*Yohana 10:10*).
- ③ Je, moyo wako ni mnyenyekevu? Je, unaamini kwamba Mungu bado anatawala na kuongoza maishani mwako, licha ya matatizo? Ikiwa sivyo, unawezaje kujifunza kuamini kwa unyenyekevu katika wema na upendo wa Mungu kwako binafsi?
- ④ Je, unadumu kila siku katika Neno la Mungu? Mwombe Mungu aamshe tena upendo wako wa kwanza Kwake unapopita katika nyakati za changamoto.
- ⑤ Ni lini uliamua kumgeukia Mungu kama Mfariji na Mshauri wako katika maombi, ukiamini kwamba ametimiza ahadi Yake ya kutokupungukia wala kukuacha (*Waebrania 13:5*)?
- ⑥ Ikiwa imani yako ni dhaifu, omba, “Bwana, naamini, nisaidie kutokuamini kwangu!” ” (*Marko 9:24*). Zungukwa na watu wanaoweza kukutia moyo badala ya kukuvunja moyo.
- ⑦ Ulimwengu haujali kila mara walio dhaifu, wajinga, waliojeruhiwa, na waliovunjika. Ujumbe wa Mungu wa “Maana uweza wangu hutimilika katika udhaifu” (*2 Wakorintho 12:9*) ni ujumbe unaoweza kubadilisha maisha ya watu kwa njia ya ajabu. Fikiria mtu ambaye unaweza kumtia moyo kwa ujumbe huu leo.

Muhtasari: Bado tunaishi katika dunia ya dhambi iliyojaa maumivu na mateso, na kila mmoja wetu hukabiliana na matatizo wakati fulani katika maisha, mambo yanayoweza kutufanya tuhoji upendo wa Mungu. Tunapotazama jinsi watu mbalimbali katika Biblia walivyokabiliana na changamoto za maisha, tunaweza kupata ujasiri kwamba mwitikio wetu katika nyakati kama hizo unaweza kuimarisha safari yetu pamoja na Mungu, ambaye habadiliki (*Malaki 3:6*) na ambaye upendo Wake husalia kuwa thabiti.